

11. januar 2016

UPA 2016/63

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

**Namminersorlutik Oqartussat kommunillu Danmarkimi nunanilu allani kiffartuussinernut atatillugu aningaasartuutigisartagaasa Naalakkersuisut UKA 2017-mut misissuinermik saqqummiussinissamik suliniuteqaqqullugit inatsisartut aalajangiiffigisassaattut siunnersuut. Missuinermi aamma innersuussutit qanoq ililluni nunatsinni kiffartuussinerit atorluarneqarnerusinnaanerat, taamaalilluni nunatta avataaniit kiffartuussinerit annikillisarnissaat anguneqaqqullugu.**

(Inatsisartunut ilaasortaq Anthon Frederiksen, Partii Naleraq).

### **Tungavilersuut:**

Naluneqanngilaq Namminersorlutik Oqartussat suliassanut, kiffartuussinernullu assigiinngitsunut sulissussinernullu<sup>1</sup> atatillugu aningaarsarparujussuarnik nunatta avataanut akiliuteqartartut. Tassani assersuutigineqarsinnaapput nunatta avataani siunnersortinut, sillimmasiinernut suliffeqarfiit Namminersorlutik Oqartussanit pigineqartut, Namminersorlutillu Oqartussani allaffissornermut aningaasartuutaat, Namminersorlutik Oqartussat nunatta avataanut suliakkiissutigisartagaat assigiinngitsut, ilarparujussuilu ilanngullugit.

Parti Naleqqamiit isumaqarpugut nunatsinni aningaasat kaaviiarnerat, isertitat aningaasartuutillu nunatsinniit aniasut tamakkiinerusumik misissuiffigineqartariaqartut, tassami nunatta aningaasaqarnera ataatsimut isigalugu, ukiut tamarluinnaasa nunatta

---

<sup>1</sup> Sulissussinerit ilaatigut ima nalunaarsorneqarsimapput: "En tjenesteydelse er betegnelsen for en arbejdsydelse eller anden ydelse, hvor der ikke er tale om køb af en egentlig vare. Det kan fx være flytning, rensning, underholdning, leje af løsøre, fx husholdningsapparater, abonnementsaftaler, transport, frisør, teleydelser, reparationer og håndværksaftaler."

<http://www.forbrug.dk/Artikler/Virksomheder/Tjenesteydelser/Hvad-er-en-tjenesteydelse?tc=091C37EC9BAA423FB92CE27203122696>. Nassuiaat soorunami tamakkiisumik nassuiaataanngilaq paasiuminarsagaallunili.

avammut niuernermini ilaatigut ukiut ilaanni 2 mia. Angullugit nunarput amingartooruteqartarpoq.

Isumaqarpugut nunarput aningaasatigut pitsaasumik ineriartussappat, minnerpaamik nunatta avammut niuernermini sinneqartooruteqarnissaa anguniarneqartariaqatoq, suliassa qarfiillu assigiinngitsut nunatsinniit annissuutiinnarnagit sapinngisamik amerlanerpaataasa maani nunatsinni suliarineqartarnissaat anguniartariaqatoq, taamaaliornikkut aamma suliffissaqartitsineq annertunerpaaq anguneqaqqullugu.

Taamaammat Partiit Naalakkersuisullu tamaasa matumuuna kaammattorpavut, Namminersorlutik Oqartussat aningaasartuutaasa misissoqqissaarneqarnissaat aammalu aningaasat atortakkatta sapinngisamik amerlanerpaat nunatsinni atorineqartarnissaat sulissutigineqassasoq.

Suliakkiinermi nunatsinni, tassami paasissutissarpasuit, soorlu naatsorsueqqissaartarfimmiit, aningaasaqarnikkut ingerlatsineq pillugu nassuiaaterpasuit il.il. pigineqareerput, tamakku atorluartariaqarpavut – avataaniit isumalluuteqaannarata.

**Pisortani aningaasaqarnikkut allaffissornikkullu kingunerisassaasat:**

Nalilerneqarpoq misissuinerup suliarineqarneranut katillugu 700.000 – 800.000 kr.inik aningaasartuuteqartoqassasoq. Nutserinermut allanullu atugassat tamatuma iluaniippat. Ilimanarportaaq misissuinerup suliarineqarata ingerlanerani misissuinerup imarisaanut tunngatillugu suleqataasunik naleqquttunik suliamut tunngasunik oqaloqatigiittarnissamut allaffissornikkut isumalluusiisoqartariaqassasoq. Tamatumani immikkut ilisimasalinnik qaffasinnerusumik ilinniarfinneersuniit ilisimasalik aallernissaq avaqqunneqarsinnaanngilaq tamannalu allaffissornikkut aningaasartuutit annerulernerannik kinguneqarsinnaavoq. Ilisimasat misissuinerup atugassat pisortanit pissarsiassaareeraluarpataluunniit Naatsorsueqqissaartarfimmiit aningaasat aniasut misissorluarnissaannut tunngatillugu immikkut ingerlatsisoqarsinnaanera avaqqukkuminaassinnaavoq tamannalu aamma allaffissornikkut aningaasartuuteqarfiussaaq.

Misissuinerup suliarineqarnerata aningaasalersorneqarnissaa Aningaasaqarnermut Sulisoqarnermullu Aqutsisoqarfiup ataaniippoq, AI2016 konto pingaarneq 20.30.01-mi allattorsimasut takukkit. Tassani aningaasaliissutaasut sipporneqassammata, konto pingaarnermi aningaasaliissutinik qaffaasinnaaneq pisariaqarsinnaavoq. Aningaasaliissutissallu pingaarnersiukkaniit allaniit aaneqartariaqassapput, soorlu kiffartuussinissamut aningaasaliissutaareersimasuniit allaniilluunniit – taamaammat Inatsisartut siunnersuut oqaluserilerunikku aamma ilanngullugu eqqartortariaqassavaat aningaasartuutaajumaartut suminggaanniit aningaasalersorneqarsinnaanersut, tassa kiffartuussinissamut aningaasaliissutaareersuniit matussuserneqarsinnaassanngippata, taamaassappallu inatsisartut AI2017-mi aningaasartuutissat aningaasaliissutissat pingaarnersiukkatut nalunaarsorneqassapput.

**Namminersorlutik inuussutissarsiortunut aningaasaqarnikkut allaffissornikkullu kingunerisassa:**

Namminersorlutik inuussutissarsiortunut aningaasaqarnikkut allaffissornikkullu imaasiallaanaq kinguneqassanngilaq. Taamaattoq misissuisitsineq ujartorneqartoq pisortani kiffartuussinerit siumoortumik agguataarneqarsinnaappata nunatsinni suliffeqarfinnut taakkualu aningaasaqarnerannut siuarsaaqataasinnaavoq iluaqusiisinnaallunilu. .

**Innuttaasunut aningaasaqarnikkut allaffissornikkullu kingunerisassa:**

Siunnersuut innuttaasunut imaasiallaanaq kinguneqassanngilaq. Taamaattoq piffissaq ungasinnerusoq isigalugu misissuineq nunatsinni inuussutissarsiornikkut siuariaataasinnaavoq aningaasaqarnerlu iluaquserneqarsinnaalluni aamma suliffissaqartitsiniarneq eqqarsaatigalugu.